

2 Pítaa

kampa'-mónó-kwáásí Ísun-aaigomba
kwaé'náer-umai simátímún-aimba Pítaa iséna
Ísuna árair-aimba tátoraigwae séna maanáimbá
agaimái mátímakaiye. Ísumba awánéta kwemó
sirón-aimba isááwándawai simátíma'mae
iyówánda-aimba tátoraigwae séna maanáimbá
agaimái mátímakaiye.

¹ kemá Sáimoni Pítaa maanáimbá
maanáúváiímbá agaimaráúmpo isáaro. kemá
Ísu Káráísitina aantá-kwaasi úndanivo kesáámó
úndantembo Áánútuun-aaiyave'o árairemo
kwésewai isáaro. kentáásí Áánútuwe Ísu Káráísiti
sáwí-imayaavinkemba iyásínkáiwaiye arupí umái
mésarai kawer-ímáyáá símakaayata mindáraise
aráápamaiya kawé'á umáíya máyaumne.
² Áánútuwe kentáásí Ísóigo Ísuntetopa'a té'a
kawer-ímáyáá tamaé'a mirámó úmae kwéiyomba
úwoi túwa'naa úmae iyésarai paru umátínkáva'a
iyíya'a ménaaowe.

Áánútu kentáámá ításinkarain-kwasai.

³⁻⁴ Ísu Káráísiti sááyowana kwená ságayanko
kwená ó'oran-kawe'-mayaigo tavisúwata
kwenópata téta kawer-ímáyáá táisaraumne. Ísu
Káráísiti mirán-kwáásígó póna kwemó kawé'á
umátinkanaumnemo siráin-aimbo éna mirá
ínimba póna kwená asirayámbá kwésimisata
Áánútuntaveta aamoí éta arupí umái méta

kwenáái simátímakaundaya póna marapáké-sáwí-ásíráyánkómó kwaásimo sáwí'o kwéiwai keinárawa tine'á íma tátoraina'a tuvíntuwe'a Áánútuwe tarúmai ménaaowe.

⁵ mindáyave'a imáyáa é'a maarámó ónááontave'a asiramái mayái máyáaro. Áánútun-aaiyave'a áraire sé'a kwenká'á agevamái máyáamba kawer-ááímbá maré'a minkákémbá kawer-ímáyáávínkéní'a kwée'a minkákémbá ⁶ kentúra'a kárakwiye'a minkákémbá asiramái mé'a íma tívón-káína'a Áánútuntave'a aamoí umái mé'a ⁷ Áánútuna akúmbá máyáantave'a túwa'naa úmae kwéiye'a kentirumbá timé'a ⁸ mirán-oro. mirámó úmae iyé'o é'a Ísóigo Ísu Káráísitina kawer-ímáyáa isé'a anóni'a umái mé'a kentí mayái áúgwara'-mayai mayánáaowe. ⁹ mirán-káwé'-máyáímó ímo kwémayaawai Áánútumo sáwí-imayaamo maitíyukain-aimba tuwinkásuwesa táá'o káúnkaiwairaamba umái máyáawe.

¹⁰ kesí kwaásiyono. Áánútu keinárawa'a tááyamai ítámakaivo imáyáa é'a kwesé asiramái máéro. mirámó é'o é'a sáwí-amba íma kwaránáaowe. ¹¹ miráumaimo méwanamo éna kentáásí Ísóigo Ísu Káráísiti sáwí-imayaavinkenta iyásínkáiwai keinárawatavena séna tíya'a kárakwiraana'a kesópa'a maí'mai'a úmae iyónáaowe síníye.

¹² minaráír-áímbá á'a ísare'a asiramái kwégwaraamba pó'a simátíma'mae iyóna'a imáyáa úmae iyónáaowe. ¹³ marapá'ó máyaundara'a simátíma'mae iyóna'a imáyáa úmae iyónáaowe. mirámó ónaunda kawerí'a

ónaumne. ¹⁴ ááéma kentáásí Ísóigo Ísu Káráísiti simásimena séna puwíníyone siráimba pó'a sáwíyanka'a puwé'a íma marapá'á ménaunda pó'a ¹⁵ mináímbá agaimaré'o púwóna awáné'a mináíntávé'a imáyáa úmae iyónááowe.

Ísuna ságayamba awánáúmne siráin-kwasai.

¹⁶ kentáásí Ísóigo Ísu Káráísiti asirayánkwará'á kumíníye-aimba íma manír-áínkáántá simátímakaundayaanivo súrandeiya kwená usáyaaitaya-sagayanta awánaraundayaveta árair-aimba simátímakaumne. ¹⁷⁻¹⁸ Áánútu ítámakain-omaka'a Ísuwe máyaawananya Áánútu kentáásivowa Ísu áwí'a anómba éna usáyaaitaya-sagayampinkemba séna kesááninko ónana ávááraumai entávéna kwésinkaisa'a ávááraumai aamoí kwéumankaumne kwíyómpakemba súwata ísaraumne.

¹⁹ ísaraundayaveta asiramái séta naaóvá'á Áánútun-ai simátímakon-aimba árair-aimban-íye. súndaya mináímbá imáyáa oró. túnkain-ayampa'a sáma kwégain-aimban-ivo mináímbá aúváívimba awánáiyana aaváúmó usénamo sámó kaintembá kentí imáyáavinkemba miráumai sáma káínana Ísu Káráísiti aaváúmó usaráisanamo kwáyáin-okoraamba umái sáma kamátinkaniye. ²⁰ simátíménda-aimba ísámai kawe'á oró. naaóvá'á Áánútun-ai simátímakowai aúváí-kwandaavimba agaimakón-ainkona ááimba kemá kwaási kentáásí imáyáavinkemba íma kanaán-umai isánaundayaawe. ²¹ íma miwítí imáyáavinkemba simái agaimakáavo Áánútun-amanko kwenáái simátimuwasa

agaimakómba Áánútun-amanko mináínkóná
ááimba kwésuwa'naa-isata kwéisaumne.

2

*Áánútun-aaigomba kwaé'náer-aimba sénááon-
kwasai.*

¹ naaóvá'á Áánútuna kwaásivimba Áánútun-
aaigomba kwaé'náer-aimba simátímakowai
paáruraantemba keinárawapimba mirán-kwáási
paárésa kampa'-mónór-áimbá simátimesa
Áánútuna kwaásimo sáwí'o ónááon-aimba
simátimesa anóndako sáwí-imayaavinkemba
iyátínkaraiwaimba tínaaemba umámiyana
naaémba Áánútu avekáán-umai tínkaminiye.
² sáwívarawai miwítí aambá kwaásimo sáwí'o
kwéon-amba kwarésa mirá iyasa tuwánésa sésa
Áánútuna kwaási sáwí'a kwéowe mináímbá simái
áair-aimba sáwí'a ónááowe. ³ óntamba mayánée
sésa aamoí kwéesa kentí imáyáa tavisénée sésa
kampa'-mónór-áimbá simátimenaawe. sáwí-
meyamba timíníwai naaóvá'á to'mayaa umái
ména tínkaminintavena timu'maréna máyáiyé.

⁴ kwíyómpaken-kwayo'narawa'a sáwí'a
untávéna Áánútu íma eétinkomba sáwí-ayampa'a
mótinkowasa tínkain-ayampa'a ándáva'a mésa
sáwí-meyambo mayánááontavesa amu'marésa
máyaáawe. ⁵ naaóvá'á Nówaa máyonka'a
Áánútuntavesa íma aamoí ésa sáwí'a untávéna
Áánútu íma eétinkomba nonkóntávéna amápa'-
marama aávú'naao súwana aávú'nowasa
putásowana mimpínkémbá Áánútu Nówawe
kwená akúmbá avakaeté-kwaasiye tíyótinkowasa

túvamai maémaembaniye. Nówaa Áánútun-aaí arupí umáimo maí-áimbá simátimuwasa íma ísónkakemba putásaraawe. ⁶ naaóvá'á Sótómu-naopaken-kwaasiye Kómóraa-naopaken-kwaasiye sáwí'a untávéna Áánútu íma eétinkomba iravímbá agaisukáivo Áánútuntavesa íma aamoí ésa sáwí'a kwéowai mináimbá isésa sésa sáwítaamo kwéundamo ímo ivátúwáananayaamo éna kentáágwará'á miráumai sínkaninimba póta ivátáámó túwáandaamo éna íma sínkaminiye sénááowe. ⁷ moóráwai áwí'a Áróti Áánútu kwentávéna púwivo séna íma auwómba áíkaiye. kwemá arupí-kwaasi éna sáwí-kwaasimo áwáyo-tantaa'o untávéna arunkó umbaí taráiyé. ⁸ miwívímbá ména aasiyaasi-táwai miwítí sáwí-aimba iséna miwítí sáwí-mayai awánówana arunkó ávááraumai umbaí tómbanivo kwemá arupí umái máyontavena Áánútu íma auwómba áíkaiye. ⁹ miráumai Áánútunavesa aamoí kwéowai umbai-yántáápínkémbá Ísóigo kawé'á umái tíyótinkena sáwí'o kwéowaiti sáwí-meyamba toréna kwaásimo máyáawaina ááimbo tísaa ínín-kanaamo tíndara'a sáwí-meyamba tímíníye. ¹⁰ áwáyo-tantaari'o kwéowai Áánútumo kwégawaaimba tínaaemba kwéumankaawai anó-sawi-meyamba tímíníye.

minkámpá'-mónó-kwáásí miwí túma mósá marésa kesááigo usáyaaitainkwae sésa kawé'nárawa'a kwíyómpakewaiyavesa sáwí-aimba kwésimatinkaantavena íma táá'a kwégaisasa úwoi sáwí-aimba kwésimatinkaawe. ¹¹ kwíyómpaken-kwayo'narawa'a miwítí

asirayánkó minkámpá'-mónó-kwáásítí
 asirayánkómbá usáyaaitaraimbanivo
 minkwiyómpákéwái Ísóigo aúranka'a íma
 aaí simátinkesa íma sáwí-aimba kwésewe.
¹² kwaí-kwaambo kwétuvu'naan-tantaakomo
 amáparawaina ááimbo ímo awánaantemba
 minkámpá'-mónó-kwáásí mirá ésa évaka-
 tantaakona ááimba íma awánaraantavesa sáwí-
 aimba simátínkáamba pósa kwaí-kwaambo
 ánásaantemba miwí mirán-umai ánásanaaowe.
¹³ miwí umbai-yántáári'a umátínkáamba
 pósa anondá umbai-yántáá'á mayánaáowe.
 miwí sáwí-imayaayavesa tirááiyavesa avora'á
 kwéesa aamoí kwéesa keinárawatemo toómbó
 nánááontavesa torupamáí mésa sáwí'a
 umátinkesa kentí imáyáa tavisésa sáwí-ampa'o
 mógwétinkaantavesa aamoí kwéesa ¹⁴ aarai
 túrampimba ta'mai-ya'mai kúráamba tivú'mae
 iyésa aamoisayán-kwáásí sáwí-ampa'a tavisimái
 mótkinkesa túran-andamo kwéowai tíráá'a póna
 Áánútu sáwí-meyamba timíniye. ¹⁵ arupí-amba
 tuwésa sáwí-amba kwégwaraawe. naaóvá'á
 Pío ááninko áwí'a Péramu kwemá Áánútun-
 aai simátímakowai éna sáwí'o uráimpinkemba
 óntamba mayánae-aamoí uráintemba miwí
 mirán-ámbá kwégwaraawe. ¹⁶ ánivo Péramu
 sáwí'a uráintavena Áánútu áwáá'a séna kwená
 póigo áwí'a tónkigomba kwaási amósánkaamba
 umánkowane aaí súwana Péramu iséna kwená
 uwo'aór-ámbá tukáiyé.

¹⁷ minkámpá'-mónó-kwáásí íma kwétuwa'naa-
 on-kwaasi máyáawe. nonayumpinkémbá
 nombá íma usamái kúmíntenkaan-kwaasima

owaná póna Áánútu miwíyávéna túnkain-ayampa'a to'mayaa umátínkaraimba pósa mivá'á komai'mai'a ónááowe. ¹⁸ miwímá sáwí'o umáimo máyáapinkembo kawepá'ó kwétewai keivári'a méonae sésa áwáyo-tantaakon-auma mósá kwémaresa kampar-áimbá kwésimatimesa ¹⁹ kentí imáyáavinkeni'o íyanamo éna misáwí-yántáákó íma tátoraniye sembánivo miwí sáwí'o kwéon-tantaako tátokaimba pósa misáwí-yántáápímbá mésa ánásanaaowe. moórá-yantaako kwaásimo kwéusayaaaitaimba minímáyáágó kweivári'a umái tátokaisasa kwenaráái kwégwaraawe. ²⁰ kentáásí Ísóigo Ísu Káráísiti sáwí-imayaavinkemba iyásínkáiwaimpa'a tésa sáwí'o kwéom-bayai ivátuwesamo tínaaembo umásukaawai miwímá moórágwara'o sáwí-ambo kwaráíyanamo misáwí-máyáígómó tátorainasamo ésa ááémo sáwí'o uráamba mindá sáwíyanka'an-ivo naaémo sáwí'o ónááomba mindá anó-sawí'a umái ménaaowe. ²¹ arupí-ambo ímo kwakésaraai sáwí'a uráasino. ánivo arupí-amba kwakésa ivátuwesa Áánútuna kawer-ámáámbá tínaaemba umáméntavesa pósa ávááraumai sáwí'a kwéowe. ²² miráumai kwésen-aimba árain-aimban-iyé. iyánkómó miímo kwi'makénamo imbá ó'omba kwénaiye kwésesa moórá-aimba sésa póígomba nombó pérankaawana imbá toivímbá kwémaiye kwésewe. iyánkó póígomo intembá minkámpá'-mónó-kwáásí mirá-sáwí'á kwéowe.

3

Ísu ókwara'a kumíníye-kwasai.

¹ kesí kwaási arupí-imayaa ígwáe sé'a moórá-
 auvai agaimái tímake'a maanáúváígwará'á
 kwéagayaumne. ² naaóvá'á Áánútun-aaí
 simátímakowai sirón-aimba isé'a Ísóigo sáwí-
 imayaavinkemba iyásínkáiwaiya siráin-aimba
 kwená aantá-kwaasiya simátímakaunda-aimba
 imáyáa oró. ³ simátíménda imáyáa oró.
 naaén-kanaa tínimba sáwí-imayaayavesamo
 tirááiyavesamo ésa aamoí íyan-kwaasi tésa
 kentuwíráái sésa ⁴ Ísumo sénamo marapá'á
 kumónaumnemo siráimba náávava máyáyo.
 naaóvá'á kwíyómba maramá taróruronka'a
 kwáyáin-tantaa'a íma ó'on-tantaa'a paárisata
 kwéawanaumpo kesivoísáíya á'a pukuráawana
 íma ó'on-tantaa'a kwévaariye sénááowe.
⁵ miwí maarán-ímáyáá ónáe íma kwésewe.
 naaóvá'á Áánútu súwana kwíyómba maramá
 paárúwana nompínkémhá maramá iyéna non-
 avumpimbá maramá kwéraiye. ⁶ naaémba
 Áánútu nonkóntávéna súwana marapá-kwáási
 ánásasukaiye. ⁷ Áánútu sisaná kwíyóne
 marawémó kwáyáimba póna kwaásimo
 máyáawaina ááimba tísaa ínín-kanaamo tindara'a
 Áánútu kwentávésamo ímo aamoimó ésamo
 sáwí'o kwéowai sáwí-meyamba tíména kwíyóne
 marawé iravímbá agaisuwáníye.

⁸ kesí kwaásiyono. maarán-ímáyáá oró.
 imó kwétaamba táámpamaiya kwéawanaumpo
 Áánútu íma mirá imbá amápa-kanaa mimbórá-
 kánáaráámbá aamun-úmarena sáwívar-ima 1,000
 ima maréna mimbórá-kánáámán-iye siráivo

9 kwemó marapá'ó kumónaumnemo siráin-aimba íma tukáisasa évakarawai mináimbá ivá'á tukáiyey-imayaa kwéowe. Ísóigo séna kesí némpa'a maí'maí'a ésa sáwí-ayampa'a kovo séna sáwí-imayaa tuwésa kesópa'a tíyantavaiye séna timu'maréna ména íma ááéma marapá'á kunkáiyey. ¹⁰ umóyán-kwáásígómó anompintumáivimbo tintenkáán-umai Ísóigo miraráán-umai kumíniye. minkánáá anónka'a awairái kwésindavinkemba kwíyómba áúyokwinana kwíyómba o'á aaváúmá iravímbá agaisuwáínana marapá'á amápa-tantaa'a kwáyáine marawé iravímbá agaisuwániye. ¹¹ miráumai amápa-tantaa'a ánásanintaveta kesáámó máyaundayaveta imáyáa éta Áánútuntaveta aamoí kwéeta arupí umái méta ¹² Ísumo marapá'ó kumíníntavena siráái kwétaisata amu'maréta méta ááémo kumíndawe séta siyáántán-kwimai Áánútuna mayái kwémayaundaya póna minkánáá paárinana kwíyómba iravímbá agaisuwáínana o'á kwíyómba aaváúmá anón-iravimba agaisuwáínana nonkáámbá umágwiniye. ¹³ ánivo Áánútu asiramái séna aúná-kwiyone aúná-marawe tarórumaraanana arupí-yantaare su'mai kwéniye siráinta amu'maréta máyaumne.

¹⁴ kesí kwaásiyono. mirán-kánááyávé'a amu'maré'a máyáamba Áánútu aúranka'a kaweré su'mai umái mé'a kempímbá íma sáwí-aimba kwáyaina'a paru umái ménaaontave'a tiyáántán-kwimai mayáímá máyáaro. ¹⁵ kentáási Ísóigo séna sáwí'o umáímo máyáampinkemba

iyátinkanaumne séna kwempá'á ténááontavena timu'maréna ména ímo kunkáimba imáyáa oró. kentáásí kwaási áwí'a Póro Áánútu kawer-ímáyáa kwembá ámakaimpinkemba keinárawatavena imáyáa éna mináímbá agaimakáíye. ¹⁶ Póro mináímbó agaimakáimba amápar-auvaivimba mirán-áímbó simáímo agaimakáin-aintompimba évakar-aimba umbaí taisasá ímo ísámaimo kawé'ó ésamo ímo asiramáimo máyáawai mináínkóná ááimba kwaé'mai kampar-áímbá kwésewe. Áánútun-aai aúváí-kwandaavinkemba amápar-aintavesa mirá ésa mirámó kwésentavesa ávááraumai sáwí'a umái ménaaowe.

¹⁷ miwí mirá kwéombanivo ímo kunkáinka'a simátimumpo kárákwiyoro. sáwí'o kwéowai keinárawa'a Áánútuwe asiramái máyáampinkembo tavisíyanesa kwéovo kárákwiyoro. ¹⁸ kentáásí Ísóigo Ísu Káráísiti kentáásí sáwí-imayaavinkemba iyásínkáiwai úwoi túwa'naa úmae iyína'a kwenópa'a anón-imayaa é'a máéro. kwenáwí'o aasiyaasimó anómbo umáímo kwaíkwai'o úmaenamo iyínimba árair-aimban-íye.

kemá Pítaamo súnda-aimba kwéanasaiye.

aúná-aimba simái tarúmakain-kwasai
The New Testament in the Kosena Language of Papua
New Guinea
Nupela Testamen long tokples Kosena long Niugini

copyright © 1980 Wycliffe Bible Translators, Inc.

Language: Kosena

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-01-26

PDF generated using Haiola and XeLaTeX on 11 Nov 2022 from source files dated 9 Oct 2020

363afe94-0b4c-5e94-bf3b-b68ce841dec7